

Aðalfundur SSV – Hótel Hamri 15 júní 2020

Tillögur um breytingar á lögum SSV

Fyrir aðalfund SSV hafa borist tvær tillögur að lagabreytingum. Í lögum SSV segir í 13 gr. að „Breyta má lögum þessum á aðalfundi. Tillögur til lagabreytinga skulu berast stjórn SSV a.m.k. tveimur vikum fyrir aðalfund. Tillögur til lagabreytinga skulu sendar út með dagskrá. Tillaga til lagabreytinga nær fram að ganga ef 2/3 hluti atkvæðisbærra fundarmanna á löglega boðuðum aðalfundi greiða henni atkvæði.“

Báðar þessar tillögur voru lagðar fyrir á fundi stjórnar SSV sem fram fór 27 maí s.l. og samþykkt að vísa þeim til aðalfundar. Í kjölfar fundarins voru þær sendar með ársskýrslu og ársreikningi til sveitarfélaganna.

A. Tillaga um breytingu á 6 gr. laga um kjör stjórnar.

Sveitarstjórn Borgarbyggðar samþykkti á fundi sínum 12.03 2020 eftirfarandi tillögu að breytingum á samþykktum SSV.

„Tillaga að breytingu á 6. gr. laga samtaka sveitarfélaga á Vesturlandi. Fulltrúar í sveitarstjórn Borgarbyggðar munu leggja það til við aðalfund að breyting verði gerð á 6.gr laga SSV. Þar segir að sá sem kjörinn hefur verið aðalmaður í stjórn þrjú kjörtímabil í röð, þ.e. sex ár, er ekki kjörgengur til stjórnar næstu tvö ár. Munu fulltrúar sveitarfélagsins á aðalfundi leggja það til að kjörtímabilin verði fjögur eða samtals 8 ár.“

Með hliðsjón af þessari tillögu er lagt til að 6 gr. laga muni verða svo hljóðandi:

Stjórn SSV skal skipuð 12 mönnum. Sveitarfélag með 3.000 íbúa eða fleiri skal eiga tvo stjórnarmenn en sveitarfélag með færri en 3.000 íbúa skal eiga einn stjórnarmann. Að fengnum tilnefningum sveitarfélaganna skal aðalfundur kjósa stjórn til tveggja ára í senn. Kjósa skal sérstakan varamann fyrir hvern aðalmann í stjórn. Formaður er kosinn sérstaklega á aðalfundi. Komi upp sú staða að stjórnarmaður eða varamaður í stjórn missi umboð sitt eða láti af stjórnarsetu á kjörtímabilinu af öðrum ástæðum skal kjósa nýjan fulltrúa í hans stað. Kosning nýrra fulltrúa getur farið fram á aðalfundi eða á haustþingi að fenginni tilnefningu viðkomandi sveitarfélags. Stjórnin kys varaformann og ritara úr sínum hópi og skiptir að öðru leyti með sér verkum. Falli atkvæði jafnt á stjórnarfundum ræður atkvæði formanns útslitum. Sá sem kjörinn hefur verið aðalmaður í stjórn fjögur kjörtímabil í röð, þ.e. átta ár, er ekki kjörgengur til stjórnar næstu tvö ár. Formaður sem hefur verið kjörinn tvö kjörtímabil í röð, þ.e. fjögur ár, er ekki kjörgengur til formennsku næstu tvö árin.

B. Tillaga um breytingu á 7 gr. laga SSV

Í umræðum stjórnar SSV þegar verið var að ræða starfsreglur samtakanna haustið 2018 var rætt um að gera breytingar á 7 gr. laga SSV. Stjórn tók þessa umræðu að nýju á fundi sínum 27 maí s.l. og samþykkti að vísa eftirfarandi tillögu að breytingu á 7 grein laga SSV til aðalfundar.

7 gr. hljómar þannig í dag;

„Stjórn SSV er óheimilt að stofna til annarra útgjalda en ákveðin eru í fjárhagsáætlun, sem samþykkt er á aðalfundi. Komi upp verkefni sem ekki er gert ráð fyrir í fjárhagsáætlun skal stjórnin kalla saman fund fulltrúa sveitarfélaganna skv. 3. grein og fá samþykki fyrir nýjum eða auknum útgjöldum eða samningum sem hafa í för með sér fjárhagslega skuldbindingu samtakanna.“

Í umræðu kom fram að með þessu er stjórn SSV sniðinn mjög þröngur stakkur og rætt um að rýmka þetta ákvæði aðeins. Tillaga að breytingum á 7 gr. yrði því svohljóðandi:

„Stjórn SSV ber að fylgja fjárhagsáætlun, sem samþykkt er á aðalfundi. Komi upp verkefni sem ekki er gert ráð fyrir í fjárhagsáætlun og felur í sér kostnaðarhækkun umfram 5% af áætluðum heildarkostnaði SSV á viðkomandi fjárhagsári skal stjórnin kalla saman fund fulltrúa sveitarfélaganna skv. 3. grein og fá samþykki fyrir nýjum eða auknum útgjöldum eða samningum sem hafa í för með sér fjárhagslega skuldbindingu samtakanna.“

Ef af þessum breytingum á lögum SSV verður er lagt til að þær taki gildi að loknum aðalfundi